

REZOLUTË PËR VLERËSIMIN E VEPRIMTARISË SË RADIOTELEVIZIONIT SHQIPTAR PËR VITIN 2017

Kuvendi i Shqipërisë:

- Vlerëson se RTSH-ja është duke u zhvilluar në drejtim të përmbushjes së misionit të vet parësor për garantimin e shprehjes së interesave të publikut dhe rifitimin e besimit të tij te ky transmetues;
- Thekson rolin kyç të RTSH-së jo vetëm në progresin e deritanishëm të procesit të digjitalizimit të rrjeteve të veta, por edhe të transmetimeve të mediave të tjera që mbështeten në të;
- Përsëritet përpjekjet e RTSH-së për transformim programor dhe organizativ, me qëllim ofrimin e programeve gjithëpërfshirëse me cilësi dhe në respektim të vlerave kombëtare e shoqërore;
- Kuvendi i Shqipërisë në ushtrimin e funksioneve të veta kushtetuese-ligjore, ndjek me vëmendje zhvillimet e RTSH-së dhe shpreh mbështetjen e tij në proceset aktuale që po zbaton RTSH-ja në drejtim të garantimit të pavarësisë editoriale, përmes forcimit të transparencës, llogaridhënies së RTSH-së para taksapaguesve të vet, si dhe rritjen e audiencës dhe besimit te publiku.

Kuvendi vlerëson arritje gjatë veprimtarisë së RTSH, për vitin 2017, sa i takon:

1. Nivelit të përmbushjes së kërkesave të rezolutës së Kuvendit për vitin 2017.
2. Gjatë vitit 2017, RTSH-ja ka një realizim aktiviteteve në mënyrë të kënaqshme në treguesit e përgjithshëm të prodhimit, treguesit ekonomiko-financiarë, si dhe në reformimin strukturor e programor, duke orientuar në shumë platforma dhe kanale të reja të pasqyrimit të jetës politike, ekonomike, social-kulturore e sportive të aktualitetit në vendin tonë.
3. Veprimtaria e RTSH-së gjatë vitit 2017 rezulton në progres drejt synimit për një media në shërbim të publikut, me një sërë aktiviteteve dhe shërbimesh të kryera në transmetime audiovizive dhe audio (TV dhe Radio) gjatë vitit 2017 për herë të parë në historinë e RTSH-së.
4. Realizimi i programeve cilësore radio dhe televizive për të informuar, edukuar dhe argëtuar publikun, duke i shërbyer kombit, të gjitha grupeve të shoqërisë, përfshirë dhe pakicat kombëtare, të cilave u është dedikuar një program i veçantë me mbulim kombëtar.
5. Sot, RTSH-ja ofron 10 kanale falas, nga ku 3 janë gjeneraliste dhe 7 tematike, 4 radio lokale, 4 kombëtare, Radio Tirana International me 24 orë transmetime në gjuhë të huaja, si dhe shqiptarët jashtë vendit mund të shohin në satelit 6 kanale dhe 4 radio.
6. RTSH-ja ka rritur arkëtueshmërinë e të ardhurave me 10 % nga reklamat, si dhe ka lidhur 47 kontrata për publicitete, njoftime apo sponsorizime programesh të ndryshme.
7. Gjithashtu, të ardhurat e RTSH-së paraqiten 11 % më të larta se të ardhurat e realizuara gjatë vitit 2016 dhe 5 % më të larta se të ardhurat e vitit 2015 pikërisht nga rritja e financimit buxhetor, i cili për vitin 2017 ka qenë më i madhi financim për RTSH-në nga buxheti i shtetit.
8. RTSH-ja ka kryer ristrukturim të plotë organizativ, duke krijuar njësitë e reja, si dhe ka hartuar rregulloret e veprimtarisë së tyre.
9. Koordinimi me AMA-n ka qenë i vazhdueshëm për implementimin e procesit të digjitalizimit, si dhe për përmbushjen e objektivave, sipas detyrimeve të përcaktuara në kontratën e shërbimit me AMA-n.
10. Zbatimi i rekomandimeve të Raportit të Komisionit Evropian rezulton i kënaqshëm, pasi procesi i digjitalizimit ka ecur me ritme të larta dhe po ashtu dhe funksionaliteti institucional e ligjor i RTSH-së.
11. Për herë të parë raporti i OSBE/ODIHR-it për zgjedhjet parlamentare 2017 ka shprehur vlerësimin për RTSH-në si i paanshëm e i balancuar, si gjatë pasqyrimit të fushatës elektorale të subjekteve politike, ashtu edhe në ditën e zgjedhjeve.

Për vitin 2018, Kuvendi i Shqipërisë kërkon nga Këshilli Drejtues dhe RTSH-ja të përmbushin këto detyrime:

1. Mbulimin me sinjal televiziv të popullsisë sipas parashikimit kontraktues.
2. Të synojë konkurrencë reale mediatike dhe shtimin e të ardhurave nga mënyra e organizimit, prodhimit të programeve dhe shitja e tyre; tërheqjen e sa më shumë reklamave, njoftimeve, arkëtimit e debitorëve; rezultate konkrete lidhur me të ardhurat që rrjedhin nga shfrytëzimi i sistemit të digjitalizimit; investimet e duhura që synojnë përmirësimin e cilësisë së programeve dhe miratimin e një plan-biznesi, që të mundësojë një administrim më efektiv të RTSH-së.
3. Përdorimin e të ardhurave kryesisht në procesin e investimit në teknologji dhe mbulimit me sinjal të programacionit kombëtar të RTSH-së.
4. Koordinim të ngushtë me AMA-n dhe operatorët e tjerë privatë lokalë, duke përfunduar të gjithë procesin e digjitalizimit.
5. Rezultate konkrete të matshme në rritjen e cilësisë dhe të ofertës televizive, përmes vijimit të ofrimit të programeve dhe shërbimeve të synuara nga RTSH-ja përmes një qasjeje pluraliste, të padiferencuar dhe informim të plotë e të paanshëm.
6. RTSH-ja të zhvillojë programacion të dedikuar edukimit ligjor dhe proceseve integruese të vendit, në kuadër të çeljes së negociatave me BE-në.
7. KDRTSH-ja të zhvillojë transparencën institucionale bazuar në detyrimet e statutit, duke pasuruar faqen zyrtare të internetit me botime periodike dhe testime mbi veprimtarinë e RTSH-së, si dhe të krijojë këndin e vendimmarrjeve të rëndësishme të Këshillit Drejtues.
8. Vitin e ardhshëm RTSH-ja të pasqyrojë një raport të dedikuar për aktivitetin e Këshillit për shikuesit dhe dëgjuesit, lidhur me vëzhgimet dhe gjetjet në lidhje me ndjekjen e shërbimeve të transmetimeve nga ana të miturve dhe të rinjve, të moshuarve dhe kategorive të tjera të veçanta të shoqërisë.
9. Për vitin 2018, Kuvendi i kërkon RTSH-së të hartojë një plan veprimesh për zbatimin e strategjisë dhe detyrimet kontraktuese për kalimin në transmetimet numerike, të kërkuara edhe në kuadër të procesit të integritetit dhe mënyrën e menaxhimit të risive teknologjike.
10. Kuvendi i Shqipërisë dhe Qeveria të kenë në fokus monitorimin e zhvillimit të RTSH-së dhe të sigurojnë mbështetjen e duhur financiare gjatë procesit të rinovimit teknologjik të RTSH-së.

Miratuar në datën 5.7.2018

KRYETARI
Gramoz Ruçi